

Ley pa proteccion di e consumidor a keda cla



DIAMARS ultimo Consejo di Minister, riba peticion di Minister Geoffrey Wever, a aproba e ley nobo pa proteha e consumidor. E ley nobo pa proteha e consumidor awo a keda aproba y lo sigui su caminda pa Raad van Advies.

Aruba no tawata conoce un ley pa proteha e consumidor, pero awo cu e aprobacion di e ley nobo aki e consumidor lo haya e proteccion cu e mester.

Proteccion di e consumidor ta un prioridad pa ministerio di economia y pa cumpli cu e promesa cu lo mehora e posicion di e consumidor. Minister Geoffrey Wever a puntra Hulanda asistencia pa traha e ley y den un periodo record esaki a keda finanlisa y awo aproba den Consejo di Minister.

E ley nobo aki ta duna Aruba Fair Trade Authority (AFTA) e autoridad pa supervisa si tin violacion di derecho di e consumidor y den cierto caso impone boet administrativo. Tambe e

ley aki ta duna AFTA e tarea legal pa informa e consumidor y empresanan tocante e derechonan cu consumidornan tin.

“Mi ta hopi contento cu e concepto di ley pa proteha e consumidor a keda cla, esaki ta un paso concreto pa mehora e posicion di cada ciudadano como consumidor y ta parti di haci e economia di Aruba uno mucho mas profesional y inclusivo”, segun Minister Geoffrey Wever.

Despues cu e ley wordo aproba den Parlamento di Aruba, AFTA lo ta responsabel no solamente pa stimula un competencia husto den nos mercado pero tambe lo contribui na educa consumidornan riba nan derecho y proteha nan contra practicanan inhusto den comercio.

Pa mas informacion over di e responsabilidad y tareanan di Aruba Fair Trade Authority (AFTA) por bishita nan webiste www.afta.aw